

23 AUG 1996

Mahathir-China

MAHATHIR KETUAI ROMBONGAN PERDAGANGAN DAN PELABURAN KE CHINA

Oleh: Zainoor Sulaiman

BEIJING, 23 Ogos (Bernama) -- Perdana Menteri Datuk Seri Dr. Mahathir Mohamad tiba di sini esok bagi mengetuai rombongan 250 pemimpin korporat dan pegawai kerajaan untuk meningkatkan lagi hubungan ekonomi dan kerjasama perdagangan antara Malaysia dan China.

Dalam masa lawatan empat hari itu, Dr. Mahathir akan mengadakan rundingan dengan rakan sejawatannya di China, Li Peng di Dewan Besar Rakyat dan menyampaikan ucap utama pada Dialog Beijing bertema "Perkongsiannya Malaysia-China" pada hari Isnin di China World Hotel, di sini

Kira-kira 700 orang termasuk 450 ahli perniagaan dan pegawai kerajaan China dijangka menghadiri dialog dua hari itu anjuran Institut Strategi Dan Kepimpinan Asia (ASLI).

Naib Presiden Eksekutif ASLI Michael Yeoh yang juga pengerusi Dialog Beijing dalam taklimatnya kepada wartawan Malaysia berkata sambutan yang hebat daripada ahli perniagaan dan pegawai China itu membayangkan minat mendalam dan kesungguhan mereka untuk mengadakan perniagaan dengan Malaysia.

Beliau berkata kebanyakan pegawai tinggi China yang akan menghadiri dialog itu sangat berminat untuk mendengar apa yang akan diperkatakan oleh Dr. Mahathir dalam ucap utamanya itu bertajuk: "Di Ambang Abad Asia: Perspektif Malaysia."

Menteri Perusahaan Utama Datuk Seri Dr Lim Keng Yaik, Ketua Menteri Pulau Pinang Tan Sri Dr. Koh Tsu Koon dan Timbalan Menteri Pendidikan Datuk Dr. Fong Chan On juga akan berucap.

Tokoh-tokoh perniagaan Malaysia yang akan menghadiri dialog itu termasuk Pengerusi DRB-Hicom Tan Sri Yahaya Ahmad, Pengerusi RHB Tan Sri Abdul Rashid Hussain, Tan Sri Tajuddin Ramli (Penerbangan Malaysia), Tan Sri Jeffery Chean (Sungai Way Group), Tan Sri Willian Cheng (Lion Group), Datuk Francis Yeoh (YTL Corporation), Datuk Tan Chin Nam (Tan & Tan Development Berhad) dan Tan Sri Vincent Tan (Berjaya Group).

Michael berkata sekurang-kurangnya 10 perjanjian usahasama akan ditandatangani pada pembukaan dialog itu antara wakil-wakil syarikat Malaysia dan China.

Selain dialog itu, ahli perniagaan Malaysia akan juga menghadiri bengkel setengah hari mengenai "Menjalankan Perniagaan di China" pada 27 Ogos apabila mereka akan diberikan maklumat terkini mengenai reformasi ekonomi China dan undang-undang mengenai usahasama.

Dalam taklimat berasingan, Duta Malaysia di sini, Amir Jaafar berkata kerajaan ingin melihat lebih banyak ahli perniagaan bukan Cina dari Malaysia melabur di China terutama dalam bidang pembinaan dan perniagaan runcit.

Beliau berkata peragangan China-Malaysia telah berkembang dengan pesat semenjak Perjanjian Perdagangan Dua Hala ditandatangani pada 1988. Dalam tempoh lima tahun lepas, perdagangan dua hala telah meningkat 255 peratus daripada RM3,200 juta pada 1990 kepada RM8,400 juta pada 1995.

Malaysia mencatatkan lebih dagangan RM2,000 juta tahun lepas dengan jumlah eksport RM5,200 juta terbanding dengan import RM3,200 juta dari China.

Malaysia terus mencatatkan lebih dagangan RM1,000 juta dalam tempoh Januari-Jun tahun ini dengan jumlah eksport ke China bernilai RM2,400 juta berbanding import RM1,400 juta.

Lawatan Dr Mahathir ke China merupakan yang keempat selaku Perdana

Menteri. Lawatannya yang lepas ke sini ialah pada 20-28 Nov tahun lepas. --
BERNAMA
ZS NMO